


*Special PNG Home of Assembly*

# WANTOK

NAMBA 1

Trinde Ogas 5 1970

Prais 10c.



# PAS I KAM LONG EDITA

Sapos yu gat tok yu raitim sotpela tasol. Sapos yu raitim longpela bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela prinim nem bilong yu tru orait yu raitim arapela nem bilong yu tu.

Dia Edita. - Bel bilong mi i gut tru taim mi harim yupela i laik kamapim wanpela nupela niuspepa ol i kolim WANTOK. Planti taim ol bikpela man bilong Niugini i wari i tingting olsem wanem yumi ken bungim moa yet ol pipel bilong dispela kantri bilong yumi. Tru, Gavman i gat planti wailles stesin bilong salim tok i go. Gavman i prinim tu planti kain liklik buk bilong bringim save long ol manmeri. Tasol ol dispela samting i bihainim ol tingting na ol aidia bilong Gavman tasol. Ol tu ol i save em i no inap.

Ol aidia na tingting bilong ol pipel yumi save painim we? Bai ol Niuginian i ken autim tingting na wari bilong em we? Olsem wanem ol bikpela man bilong gavman i ken mekim nupela lo o kamapim nupela pasin sapos ol i no save gut long tingting bilong ol pipel yet? I no ken. Bai tok kros na trabel tasol i kamap. Nuispepa i gat wok bilong autim ol tingting na wari bilong ol pipel, bai olgeta arapela man i ken ritim na harim na save long ol. Olsem niuspepa i nambawan samting bilong kantri bilong yumi.

Tru tumas, yupela man i wok long raitim niuspepa WANTOK bai i gat hatpela wok tru. Ating yupela i laik ol bikpela man i insait wantaim yupela na i wanbel tru wantaim yupela. Orait, yupela i mas soim ol man bilong Niugini tingting bilong yupela i bihainim tingting bilong ol yet.

Tasol, lukaut! Yupela i no ken bihainim wanpela lain o wanpela pati. Nogat. Yupela i sanap namel long ol, bai yupela i ken skelim tingting bilong ol. Na yupela i no pret long autim tingting bilong yupela yet. Maski, sampela man i no laik harim. Maski sampela man i kros. Yupela i no ken pret. Yumi man bilong Niugini yumi mas gat sampela man i sanap strong olsem. Bel bilong mi i gut long yupela. Holim gut wok.

John Guise  
(Siaman Haus av Asembli)

Dia Edita.- Mi amamas tru long save bai wanpela pepa i kamap namel long yumi. Planti taim mi go long sampela hap longwe long Niugini. Long taim mi bungim wanpela long yumi long sampela ples olsem Australia, mi save tok se, em i wantok bilong mi. Maski mi no save long tok ples bilong em, tasol mitupela bilong wanpela hap, na mitupela i ken toktok long Tok Pisin o Inglis. Mi ting em i mining bilong dispela pepa.

Long dispela taim yumi gat planti buk long tok Inglis. Tasol Dispela i helpim ol manmeri em ol i save tok Inglis. I no gat planti buk long ol tok ples na tok Pisin. Mi ting em i wanpela gutpela samting long WANTOK. Planti manmeri, ol na yang bai i ritim. Mi amamas long dispela pepa, na i save ol long Yunaitet Sios long Niugini Ailan Rijan bai ol i laikim dispela pepa.

Tasol i pasin bilong dispela kain wok o pepa, bai i no wok gut sapos ol manmeri em ol i laikim ritim dispela pepa i no rait i go na putim stori o nius long dispela pepa. Bai mi askim ol, na ol pipel long Yunaitet Sios long N.G.I

R. bai ol i tingting long salim samting bai pepa bilong yumi i ken helpim yumi, na em i ken wok gut tasol long helpim bilong ol.

Tenkyu, ol wantok, sapos yumi wok bung long dispela pepa bai yumi ken amamas long olgeta taim yumi ritim WANTOK = em pepa bilong olgeta.

Saimon Gaius  
(Bisop bilong Yunaitet Sios)

Dia Edita.- Bipo, long taim tumbuna bilong yumi, ol i no gat niuspepa, ol i no save long rit na rait. Olsem na ol i singaut tasol long man i stap klostu. Man i stap longwe ples, ol i sutim garamut long ol, na winim taur long ol. Dispela i olsem bringim tok i go i kam.

Bipo tumbuna bilong yumi ol i mekim olsem na save long narapela narapela na toktok wantaim. Sapos garamut i krai baimbai ol i tok "singautim yumi". Sapos taur i krai na ol i save tok: "singautim yumi".

Sampela taim ol i save pasim tanget o pasim rop bilong makim de bilong wantok i go i kam.

Nau dispela taim em i nupela taim i kamap. Politikal na Ekonomik na Sosial. Dvelopmen bilong kantri i kamap bikpela, na yumi mas i gat wanpela pepa i bungim yumi olgeta Papua Niugini wantaim, na pasin bilong Kristen i kamap gutpela. Olsem na mipela long Evanjelikal Luteran Sios bilong Niugini i amamas tru na tok gude long dispela niuspepa "WANTOK"

Yumi lida i raitim tok i go long dispela pepa na yumi wanbel na wok wantaim na kirapim kantri i kamap gutpela.

Rev. Zurewe K. Zurenuo.  
(Nambatu Bisop bilong ELCONG Luteran Misin.)

## Somare Tok Long Sydney

Wanpela lida bilong Pangu Pati, Michael Somare, i bin tok long Sydney olsem: em i kirap nogut long lukim hamas samting kantri bilong Afrika i bin go het bipo ol i kisim independens. Em i kirap nogut tu long lukim planti waitman moa i wok yet insait long gavman bilong ol dispela kantri. Em i tok wok bilong Australia long Niugini i no inap long wok bilong Englan insait long Afrika.

Mr. Somare i bin go wantaim wanpela selek komiti bilong Haus av Asembli bilong lukluk raun long Afrika. Dispepla komiti i bin lusim Port Moresby long Jun na ol i bin stap inap wan mun long Afrika. Em hia ol arapela memba bilong dispela lain: Mr. W. Lussick, Mr. Donatus Mola, Mr. Ebia Olewale na Mr. Tom Leahy.

Wanpela arapela lain bilong Haus av Asembli i lusim teritori long dispela mun bilong go lukluk raun long ol kantri i stap long Saut Pasifik. Em hia ol memba bilong dispela lain: Mr. Paulus Arek, Mr. Matias Toliman, Mr. Sinake Giregire, Mr. Oala Oala Rarua, Mr. John Middleton, na Mr. Geoff Littler.

Long bigin bilong dispela yia tupela lain wantaim bilong Selekt Komiti i go raun long Niugini na mekim kibung wantaim ol pipel na toktok long taim bihain bilong Teritori.

Dispela tupela lain i mas givim ripot long Haus av Asembli long ol lukluk raun bilong ol insait long Niugini na ol narapela kantri. Bai ol i mekim long miting i bigin long namba 31 de bilong mun Ogas.



## Niuspepa Bilong Yu

Gude, wantok! Nau yu lukim hia namba wan taim dispela nupela niuspepa yumi kolim Wantok. Em i Wantok tru bilong yu, bilong yu stret.

\*\* \*\*

Nau yu harim. Niugini em i kantri bilong yu. Tok pisin em i tok bilong yu. Nau yu gat wanpela niuspepa bilong yu stret, em Wantok tasol. Inap nau i no gat wanpela ples yu ken autim wari bilong yu, tingting bilong yu, laik bilong yu. Inap nau maus bilong yu i pas. Nau dispela niuspepa i kamap na i tok long yu, i spik: "Poroman, mi wantok tru bilong yu. Yu gat tok, yu autim - bai mi ken harim, na mi ken bringim i go long planti man".

\*\* \*\*

Yu laikim tumas bai Niugini i go het. Em i gutpela tru. Tasol, poroman, yumi mas lainim pastaim ol arapela kantri i go het olsem wanem; yumi mas kisim save long ol. Inap nau husat i bin tokim yu ol dispela samting? Ating.....

\*\* \*\*

Yu laik harim tu ol hetman bilong yumi i mekim wanem long Pot Mosbi. Bai mipela i tokim yu. Na sapos yu no laikim samting ol i mekim, orait, nau yu ken tok. Inap nau, no gat man i ken harim yu. Nau mipela i givim maus long yu - na mipela i givim tu planti yau i ken harim yu.

\*\* \*\*

Yu save gut tumas wok bilong wanpela wantok. Wantok tru em i save skulim yu, em i givim gutpela tok long yu, em i strongim bel bilong yu, em i tekewe wari bilong yu, em i helpim yu, em i mekim bai yu sindaun gut. Orait, ol dispela samting em i wok bilong niuspepa Wantok tu. Em i Wantok tru bilong yu!

\*\* \*\*

Na wanpela samting moa: inap nau i gat kain kain tok i save kamap long tok pisin. Tasol husat inap ritim? Em i hapkas tok pisin tasol. Man i hatwok long ritim. Dispela niuspepa Wantok em bai i spik olsem wantok tru bilong yu, em i no tanim tok pisin. Nogat. Em i tok olsem yu yet yu tok.

\*\* \*\*

Sampela taim yu save lukim pepa i kamap long wanpela bisnis o wanpela misin, o wanpela pati, o wanpela kiap o gavman. Ol man hia i bihainim tingting bilong ol yet. Dispela niuspepa Wantok i no mekim olsem, em i no bihainim tok bilong wanpela lain tasol. Nogat. Mipela i save kisim nius na tok bilong olgeta wantaim. Sapos ol i gat gutpela tok; tok yu mas harim, orait, mipela i hepi tumas long autim bai yu ken harim. Mipela i pren bilong ol - tasol namba wan mipela i pren bilong yu.

\*\* \*\*

Wanpela kantri i no ken go het sapos ol pipel i no gat niuspepa bilong ol yet. No ken tru. Em nau: kantri bilong yu. Em hia: Niuspepa bilong yu - Wantok.

\*\* \*\*

Yu harim: mipela i wok long helpim yu. Yu mas bekim: yu mas helpim mipela. Mitupela i mas wok wantaim. Mitupela i mas poroman tru. Yu ting wanem? Nogut yu sarap i stap. Mipela i wetim tokbek bilong yu.

# OL MATAUNGAN I GO WE NAU

(Rabaul Ripota)

Ol Mataungan bilong Rabaul i bin pinisim tok kros na pait wantaim gavman - bilong nau tasol. I no gat man i ken save wataim bai ol i kirapim bek. Inap nau gavman i bin lusim klostu wan milion dola long dispela trabel long Rabaul.

Planti niuspepa moa i bin prinim stori long ol pasin bilong ol hetman bilong ol Mataungan. I no stret yumi kolim ol hetman hia "Presiden" o "Wasapapa" o "Kuskus" samting, long wanem Mataungan Asosiesen i no bin kisim namba yet na planti tingting na lo bilong ol i hait yet.

Gavman i bin singautim samting olsem 1200 plisman wantaim masket bilong go long Rabaul; na ami tu i sambai redi long helpim ol. Tru, ol Mataungan i belhat na i bikmausim ol, tasol i no gat pait i kirap. Dispela taim em i namba wan taim ol plisman i win liklik, na ol Mataungan i surik i go bek. Tasol nau bai wanem samting i kamap? Gavman tu long Rabaul i no save.

Ol Niuginian na waitman i save tru insait bilong ol dispela trabel i ting na tok olsem:

Ol Mataungan i no kraik tumas long ol graun long Keravat. Ol i pasin tingting bilong ol man long dispela ol hap tasol.

Sapos ol Mataungan i surik i go, i no bilong oltaim. Nogat. Bai ol i kam bek planti taim, mekim mekim inap ol i win....o pait bai i kamap wantaim ol plisman.

Ol hetman bilong ol Mataungan i hambak moa, long wanem ol i pilim ol bin winim gavman oltaim inap nau. Ol i laikim tumas ol niuspepa i kisim tok na piksa bilong ol. Ol i ting Mista

Whitlam bai i helpim ol tru. Tingting bilong ol i solap moa, na sampela i ting God yet i helpim maus bilong ol taim ol i toktok wantaim ol bilong ol.

Gavman i sem liklik na i lusim planti mani moa long dispela ol trabel. Inap nau gavman i no bin stapim ol Mataungan. Tasol gavman i no ken surik moa. Nogut em i lusim namba na strong bilong bosim graun.

Planti man i ting i gat wanpela man tasol inap long stretim dispela trabel, em i nupela nambawan gavman, Mista Johnson. Taim em i namba tu gavman yet, em i bin mekim strongpela stret-pela tok long Oscar Tam-mur na ol man bilong em. Em i no man bilong tok-tok nating; em inap makim save long ol.

As bilong trabel em i fopela hap graun. Tripe-la hap i stap arere long wara Kerevat, ol Tolai bilong bipo i bin kisim long ol Baining tasol. Mista H. West, kiap bilong Rabaul, i tok gavman yet i bin baim ol fopela hap graun, i bin makim, na i laik tilim long ol Tolai na ol Baining.

I gat 800 hap graun bikpela i go long bilong ol eka inap 90 eka. I no gat tok, sapos ol Mataungan yet i bin putim nem bilong kisim wanpela wanpela hap graun, bai ol i ken kisim. Tasol ol yet i no laik wetim tok

Lukim Long Pes 5

Olgeta tok  
 i stap long dispela niuspepa  
 ol i bin paitim pastaim  
 long wanpela masin bilong rait,  
 nem bilong em . . .

*Olympia*

TERRITORY AGENTS

**BRECKWOLDT & CO. (N.G.) PTY. LTD.**

PORT MORESBY  
 P.O. Box 1549, Boroko.

MADANG  
 P.O. Box 185.

LAE  
 P.O. Box 557.


RABAU  
 P.O. Box 222.

MT HAGEN  
 P.O. Box 237.

WEWAK  
 P.O. Box 178.

KIETA  
 P.O. Box 72.

**STRIKE UP THE BAND!**



**Tomorrow is taking shape today . . .  
 Today man travels in outer space . . .  
 explores the secrets of the Universe.  
 Today man puts science and technology to  
 work in new ways expanding production  
 increasing leisure, assuring a better, more  
 abundant life for all. The wonders of  
 tomorrow take shape today . . . and we  
 in Papua-New Guinea know the impact of  
 amazing changes throughout our daily  
 lives. Ours is a partnership with progress,  
 meeting challenges, sharing  
 responsibilities. We at Burns Philp are  
 striving for greater service and shopping  
 comfort for each and every one of our  
 customers and with this goal, present to  
 you a wonderful new world of shopping . . .**

Burns Philp as one of the Founders of Trade  
 and a partner in the development of the  
 Territory are proud of the Giant steps taken  
 in the last 30 years to forge this great country  
 into the emerging nation it has become today.

Burns Philp, Agents for the most  
 sought after products including:-

- National radio & appliances
- Stormline louvres
- British Paints Ltd.
- Philips Appliances
- James Hardie Products
- Alpina Cyma Watches
- Caron Marcel Rochas Perfumes
- Mikimoto Pearls and Rings
- Seppelts Rhum Negrita
- John Valves McNaught fittings
- Hermes typewriters Byford Sox
- Maidenform Max Factor
- Ronson Wilkinson Sword.

**BURNS PHILP** (NEW GUINEA) LTD.

SERVING YOU BETTER



Hap Long Tok i stap  
Long Pes 3.

bilong komiti bilong bosim graun. Ol yet i go insait, kisim wanpela bikpela hap, katim bus; na laik tilim aut long laik bilong ol yet. Ol i tok dispela olgeta graun i bilong wanpela Tolai tasol na gavman i no bin baim. Tasol sampela man i tok em i no pasin bilong ol Tolai. Long pasin bilong ol, ol i kolim "vunatarai", wanpela hap graun i no bilong wanpela man; i bilong lain bilong em, o tupela tri-pela lain wantaim.

Na ol Mataungan i mekim kranki tu taim ol i sindaun long dispela graun. Ol i kalapim mak i kisim hap graun long Skul Didiman long Vudal. Sori sapos i gat wanpela papa tru bilong graun, ating em i mas save long mak bilong em.

Inap long 4,000 ol Mataungan i bin sindaun

long ol hap graun bilong Keravat. Na taim ol i rausim Oscar Tammur, long wik i go pinis, em i bin tok bai em i kam bek wantaim 15,000 man samting.

Sampela man tu i tok i gat narapela as bilong trabel long Keravat. Em hia: Long yia 1959 wanpela hetman bilong ol Mataungan, John Kaputin, i bin mekim trabel na ol man bilong Keravat i bin rabisim em tru. Bel bilong em i hat yet long dispela samting na em i laik mekim save soim waitman na i bikpela man tru.

John Kaputin na Oscar tammur, tupela i saveman tru long ol pasin bilong tanim bel na tingting bilong planti man. Kaputin i bin stap long Lae na i bin toktok gen insait long wanpela kibung bilong ol skulboi. Tam-mur i hambak i tingting em i bin winim Namba wan

Gavman bilong Australia, Mista Gorton, long ples balus bilong Rabaul. Nau em i save mekim kain toktok olsem:

(A) Em bai i singaut long Yunaitet Nesens.

(B) Em bai i singaut long pati bilong ol wokman bilong Australia bai ol i helpim em long kot.

(C) Em bai i go long wanpela kantri bilong kisim help bilong rausim ol Australia long Niugini. Em i no kolim nem bilong kantri em i laik go long en.

Kain mauswara olsem ol niuspepa i laikim tumas, na dispela samting Oscar tu i save tumas.

Tasol ol hetman bilong ol Mataungan bai i lusim kwiktaim ol pren bilong ol long redio na niuspepa sapos ol i mekim pasin olsem ol i bin mekim long ples balus bilong Rabaul taim Mista Gorton i bin kamap. Pas-taim ol ripota bilong

redio na niuspepa i bel-gut long ol Mataungan. Tasol bihain ol hetman hia i spak liklik long buai na bia, ol i kam bek ronim ol ripota pren bilong ol na i "mekim pasin bilong ol welman", olsem wanpela bilong ol i ripot.

Kain pasin olsem i bin mekim nogut bel bilong planti, pren bilong ol Mataungan. Olsem nau ol i tingting planti, i givim baksait long ol Mataungan na i sambai long gavman. Em trabel bilong Oscar tasol na ol wanwok bilong em.

Wanem samting bai i kamap nau? Husat i ken save? Dispela niuspepa i no gat tok. Em i sambai tasol bilong autim olgeta nius bilong dispela trabel bilong Rabaul.

Sapos mi pasim han..... mi no ken givim wanpela samting, na mi no ken kisim wanpela samting tu.

## B.&G. MOTORS PTY. LTD.




P.O. BOX 4, WEWAK  
PHONE: 123, A.H. 257.



Vehicle Repairs & Service

All Work Done By Expert Mechanics



### NEW CAR SALES


AGENTS FOR: DATSUN - NISSAN - FORD CARS - FORD TRACTORS

## WEWAK NEWSAGENCY & STATIONERS

P.O. BOX 4, WEWAK  
PHONE: 122, A.H. 257

Australian & Local Newspapers

Books, Stationery, Magazines, Postcards, Etc.



AGENTS FOR: ELECTROLUX FREEZERS - HOOVER - SONY - EVINRUDE

OUTBOARD MOTORS - VICTA LAWN MOWERS

# Hay I Go

Mista D. Hay wantaim misis bilong em tupela i lusim Teritori long Fonde namba 23 de bilong mun Julai long kisim nupela wok long Australia olsem kuskus bilong Dipatmen bilong ol Teritori. Dispela dipatmen i lukautim Niugini na Mista C. Barnes i bosim.

Mista Hay i kamap olsem namba wan gavman long yia 1967 na em i kisim ples bilong Sir Donald Cleland.

Bipo Mista Hay i bin mekim tupela wok long Australia. Pastaim em i wok long Yunaitet Nesens olsem maus bilong ol Australia. Bihain em i wok olsem namba tu kuskus bilong Dipatmen bilong ol Teritori.

Taim Mista Hay i lusim Teritori, em i bin mekim dispela tok hia.

Namba wan taim mi bin kamap long Teritori bilong Niugini long Januari 1967. Mi amamas long wanem i gat wanpela bikpela wok i stap: wok wantaim ol Niuginian bilong helpim i go het. Dispela wok i no pinis yet. I gat wok moa, em gavman na Haus av Asembli i save mekim toktok long yupela ol pipel i mas mekim. Bel bilong mi i hepi na bel bilong Misis Hay i hepi tu long ol dispela wok i bin stat.

Mitupela i go, tasol mitupela i no lusim yupela olgeta. Bikpela wok bilong mi olsem sekretari bilong Dipatmen bilong External Teritori, em i long painim ol pasin bilong helpim Teritori i go het. Insait long dispela nupela wok, mi bai wok klostu tru, wantaim nupela Administrata bilong yupela, Mista Leslie Johnson.

Mi bin raun planti na lukluk long olgeta hap bilong Teritori. Mi bin lukim yupela long ol ples wok, mi bin inap tru long sindaun wantaim ol lida bilong yupela, na lainim ol samting bilong ol tingting bilong yupela. Mi bin go long


ol ailan, Niugini bikples, na Hailans na insait long Papua tu.

Mi amamas olsem long taim mi stap olsem namba wan gavman, na Haus av Asembli i bin kamap bikpela wantaim planti moa netif elektif memba, na 8-pela long ol dispela memba i wok wantaim mi olsem ol memba bilong eksekutif kaunsil.

Em i nogutpela long tok olsem: mipela bai mekim olgeta wok bilong gavman nau, sapos planti pipel i no tok orait, na mekim wanpela tok tasol long dispela. Planti pipel i no save mekim wankain toktok yet long wanem kain gavman ol i laikim. Gavman bilong Australia i wok nau long mekim olgeta samting em i ken bilong bringim dispela taim i kam hariap. Selek komiti bilong Konstitusional Developmen i bin go painimaut tingting bilong ol pipel. Em i painim tu ol pasin bilong gavman insait long ol arapela kantri olsem bai i ken mekim ripot i go long Haus av Asembli long ol dispela samting.

Dispela teritori i bin go het long planti gutpela pasin. Wanpela bikpela samting em long edukesin. Ol gavman skul na planti long misin skul nau i bung wantaim aninit long nupela edukesin sistem. Ol Niugini i go het tu long ol bisnis na wok bilong faming, na planti arapela samting.


Em i tru olsem i gat ol trabel. Tasol mipela i mas i gat trabel insait long wanpela kantri em i wok long go het hariap. Long wanem i gat planti senis i kamap long olgeta de. Sampela pipel i no inap long



save long ol dispela senis i kamap na dispela i ken statim ol trabel.

Tasol mi bin painim olsem ol Niugini i save moa long planti samting. Planti taim i go pinis, ol i gat pasin bilong sindaun na toktok long ol trabel bilong ol:long wok, na pe planti arapela samting. Planti long ol trabel ol i bin stretim long dispela pasin. Mi ting olsem bai yupela i wokim yet dispela pasin bilong sindaun na toktok long ol trabel o wari bilong yupela.

Mi, mi no lusim yupela, tasol bai mi stap klostu long yupela. Mi ting bai mi kam bek long Niugini planti taim, olsem mi ken lukim yupela long ol pasin em yupela i go het na olsem bai mi ken toktok liklik wantaim planti olupela pren namel long ol kain skin insait long Teritori.



Thomas Tobunbun

## Gazelle Presiden I Dai

(New Guinea News Service)

Mr. Thomas Tobunbun, Presiden bilong Gazelle Kaunsil long Is Nu Briten, i dai long Nonga haus sik long Rabaul long namba 15 de bilong mun Julai. Em i bin kisim bagarap long ka. Ol Yia bilong em inap 48.

Mama i bin karim em long ples Matupit klostu long Rabaul. Em i go skul long Nondup na long yia 1948 em i go treiring long Sogeri. Bihain em i wok olsem tisa bilong gavman. Pastaim ol i salim em i go long ples bilong em yet na bihain em i go tisa long Madang na Maprik. Long yia 1954 em i go bek long Nu Briten long tis long hap bilong Rabaul. Bihain em i kamap nambawan tisa bilong Matupit viles skul.

Long yia 1964 em i sanap long maus bilong Ejukesen Dipatmen long bikpela kibung bilong Saut Pasifik Komisen long Noumea long Geneva long yia 1965 em i go long kibung bilong sosaiti bilong ol wokman na em tu i wanpela bilong ol kaunsila em ol i bin go lukluk raun long Australia.

Mr. Tobunbun i bin statim asosiesen bilong ol wokman long Rabaul em i namba wan presiden bilong dispela asosiesen inap 6-pela yia. Em i bin stap long Gazelle Kaunsil inap 8-pela yia. Em i kamap presiden 2-pela wik bipo em i dai. (N.G.N.S.)

God yet i save lukautim yupela. Olsem na olgeta hevi bilong yupela em tupela mas putim long han bilong em. (Pita 5,7)

# Johnson I Kam

Mista L. Johnson i bin kisim ples bilong namba wan gavman long Fonde, de namba 23 bilong Julai. Em i gat 54 krismas. Long April 1966 inap dispela yia em i holim wok bilong namba tu gavman Bihain ol i singautim em bilong bosim wanpela bikpela skul long Tasmania.

Long yia 1962 inap 1966 Mista Johnson i hetman bilong bosim ol skul hia long Niugini. Sampela taim tu em i helpim namba wan gavman, taim em i no stap, o i go lip.

Namba wan gavman bilong Australia yet, Mista Gorton, i bin askim Mista Johnson long kam bek long Niugini bilong kisim ples bilong namba wan gavman. Sampela man i kirap nogut taim ol i harim dispela tok. Tasol planti moa i ting Mista Gorton i bin makim Mista Johnson long wanem ol manmeri bilong Niugini i laikim em tru tru.

Taim em i kamap long Port Moresby, em i mekim dispela tok:

Mi wantaim Misis bilong mi, mitupela i bin lusim Niugini long mun April bilong go long Australia na nau mitupela i amamas gen long kam bek lukim yupela. Mitupela i tekim tru ol pipel bilong Niugini

long salim ripot i go long Australia na Gavman bilong Australia i tok orait long mitupela i kam bek.

Wok bilong namba wan Gavman insait long Niugini i bikpela moa, tasol mi amamas long wanem planti pipel long Niugini bai i wok wantaim mi.

Mi no inap promis wanem samting bai i kamap long taim bihain, tasol mi save gut tumas yumi mas gat wanem samting hia long Niugini. Yumi mas gat moa pipel i gat save, yumi mas kisim gutpela sindaun, painim gutpela rot bilong salim ol toktok, wokim moa gutpela rot na moa gutpela haus, kirapim planti bisnis na moa wok bilong ol wokman.

Yumi laikim planti lokal ofisa i mas kam kwiktaim insait long Pablik Sevis, na mipela laikim tu moa pipel bilong Niugini mas go insait long wok bilong

didiman na was long ol bisnis bilong kantri. Ol dispela wok i laikim planti saveman na planti na planti savemeri na i laikim planti mani tu bilong kirapim i go het.

Orait, yumi laikim wanem samting? Yumi stap hangre nau, bai yumi kaikai gut long taim bihain? O yumi kaikai nau, bai sampela yia bihain yumi stap hangre?

Sapos mani yumi kisim i no inap long baim ol samting yumi laikim, yumi mas askim yumi yet long mekim moa wok bilong kisim inap mani.

Long taim bipo Niugini i bin wok hat tru. Planti helpim i kam long Gavman bilong Australia



na ol pipel bilong Australia. Ol Kristen pasin bilong arapela kantri i save helpim tu arapela kantri i save go het.

Lukim long Pes 15

## Yu Gat Tok --- Yu Laik Kaikai---

(New Guinea News Service)

Nupela namba wan gavman, Mista Johnson, i bin tokim Mista Guise, siaman bilong Haus av Assembly, olsem: "Olgeta taim yu laik sindaun toktok wantaim mi, o sindaun kaikai, yu kam tasol."

Mista Johnson i bin mekim dispela tok liklik taim bihain em i bin kam bek long Niugini long de namba 23 bilong Julai.

Mista Guise i bungim Mista Johnson tupela misis bilong em long ples balus. Em i givim kis long han bilong Misis Johnson, na i holimpas

tru Mista Johnson.

Mista Guise i bin tok olsem long ripota bilong Niugini Nius Sevis: "Em tupela hia i gutpela pipel tru. Ating nau ol samting long Niugini bai i ran gut tru."

Niugini Nius Sevis i tok se, namba wan gavman bilong bipo, Mista Hay, i gutpela man tru tasol em i no save pren long ol man kwiktaim tumas. Olsem na planti man i gat tok o wari long ol bikpela samting bilong Teritori, i pret long go toktok wantaim em. (N.G.N.S.)

### OLGETA KAIN KAIN

# SEL

BILONG SIP, TRAK, PLANTESIN  
- O HAUS I GO ANTAP LONG HAP KA

## MIPELA SAVE WOKIM GUT

Mipela save wokim gut sel long olgeta kain-kain laplap. Ol i nambawan kain laplap bilong sanap strong long san i hat na bikpela ren long dispela kantri hia. Laplap hia ol i kolim katen, o kanis, o nailon. Sapos yu laik askim sel i kostim hamas, yu mas raitim pas i kam long mipela stret na toksave long wanem kain sel yu laik, na bikpela bilong em. Na mipela bekim pas i kam bek stret long yu. Ating ol kepten bilong ol smolpela sip i save pinis long mipela. Faktori bilong mipela i save tumas long wokim planti sel moa bilong ol. Yu rait long mipela pastaim!

\* MI KEN SALIM I GO INSAIT LONG 24 AUA

\* SALIM I GO LONG OLGETA HAP PLES

### CANVAS & CORDAGE PTY. LTD.

AH CHEE AV., RABAUL.

P.O. BOX 476

PHONE 2008.

# Pop I Kam Long Australia

Long mun Novemba hetman bilong ol katolik, Pop Pol, bai i flai, i kam long Sydney, bilong kamap long wanpela kibung bilong ol bisop bilong Australia, Niugini, Niu Zilan, na ol Pasifik Ailan.

Long hap rot balus i bringim Pop bai i pundaun pastaim long Manila long Filipin Ailan. Hia bai ol bisop bilong 16 kantri i kibung wantaim em. Ol bai i kam long dispela ol kantri hia: India, Seylon, Taiwan,

Saina, Indonesia, Not na Saut Korea, Paskistan, Not na Saut Vietnam, Burma, Japan, Laos, Kam-bodia, Singapor, na Filipins.

Dispela wokabaut bilong Pop i winim ol arapela em i bin mekim bipo; na em i namba wan taim em i kam long hap bilong Saut Pasifik. Dispela Pop Pol i bin lukluk raun long: Israel, India; Not America, Tarki, Swiselan, Uganda long Afrika, na long Saut Amerika.

Long yia i go pinis 1/4-pela sosaiti bilong ol katolik bilong Australia i bin askim Pop long kam long Australia, long wanem dispela yia i pesto bilong Kepten Kuk i painim Australia namba wan taim. Ol i tok sapos Pop i kam, em i givim bikpela ona long kantri yet, long ol pipel bilong Australia, na long sios bilong Australia.

Planti tausen pipel long ol kantri klostu long Australia bai i flai i go long Sydney long mun Novemba bilong lukim bikpela misa bai Pop i mekim insait long wanpela bikpela ples pilai.

# Niugini Nius Sevis

Wantok em i no wanpela niuspepa bilong wanpela lain o misin o pati. Bilong em yet em bai kisim nius i kam long olgeta hap na long olkain samting. Bai em i poromanim wanpela kampani bilong bungim nius, ol i kolim Niugini Nius Sevis.

Niugini Nius Sevis i kamap long Jun long yia 1969. Wok bilong em bilong kisim nius i kam long Niugini na salim nius bilong Niugini i go long ol arapela kantri.

Hetkota bilong dispela kampani i stap long Port Moresby na i gat sampela man bilong Australis, Niugini, na Wes Irian i bung long mekim dispela wok bilong bungim nius.

Niugini Nius Sevis i salim ol nius bilong Niugini i go long: Associated Press bilong Amerika, Copley Nius Sevis (Australia), Time Life Incorporated, Readers Digest, Pacific Islands Monthly, Pacific Islands Trade News, Macquarie Broadcasting Service, Radio 2GB, 3DB, 3AW, New Zealand Broadcasting Corporation na planti arapela tu.

Niugini Nius Sevis i save primum planti smolpela niuspepa bilong Niugini. Em sampela hia: Kaunsil (niuspepa bilong ol lokal gavman asosiesen), P.S.A. Bulletin (bilong ol man i wok long gavman), Kibu (bilong ol koprativ sosaiti), Kumul (bilong ol plisman) na Pangu pati Nius.

Samting yupela i kisim em yupela i kisim nating na i no gat pe long en. Olsem na yupela i mas givim dispela long ol na yupela i no ken kisim pe long en. (Matyu 10,8)



For all your electrical and photographic requirements.

## WIRUI STORE



AKAI PHILIPS  
NATIONAL  
HITACHI SANYO

CAMERAS  
SLIDE PROJECTORS  
MOVIE EQUIPMENT

## WIRUI STORE

P.O. Box 107, Wewak.  
Telephone 252.

Dispela stua em i as ples bilong baim ol samting bilong wailis na bilong poto.





## Nilles Winim Ileksen

Long 14 de bilong mun Julai Pater Jon Nilles i win long ileksen long Chimbu. Em i kisim 18,496 vot.

Dispela tok i kam long hetman bilong bosim ol ileksen, Mr. Simon Kauni.

Namba wan taim ol vot i kamap olsem:

Jon Nilles, 17,114 vot.  
Imbakey Okuk, 5,745 vot.  
Gela Dom, 5,698 vot.  
Fransis Irere, 4,738 vot.  
Graham Gilmore, 4,258 vot.

Long las kaunim ol vot i kamap olsem:

Jon Nilles, 18,496 vot.  
Imbakey Okuk, 6,084 vot.  
Gela Dom, 5,887 vot.  
Fransis Irere, 4,949 vot.

Orait, long las kaunim bilong ol vot Mr. Graham Gilmore i lusim vot pin-is.

## Tripela Soldia Kisim Medal


Brigadia R. T. Elridge, nambawan ofisa bilong Ami bilong Niugini i givim bikipela amamas long Koprak Nawari Larowe bilong ples Naidri klostu long Aitape long Wes Sepik Distrik, na i givim em wangepela medal long gutpela wok bilong em. Em i bin stap long ami inap 18 yia. Arapela tupela soldia em hia: Staf Saiden Stephenson Watuna-Baragani bilong Wedau long Milne Bay Distrik na Waren Ofisa, Klas 2, Reg Brown bilong Gosford long Niu Saut Wales. Tupela tu i kisim wankain medal olsem Nawari Larowe. Ol i bin mekim ol dispela samting long Taurama Barracks long Port Moresby taim ol i mekim bikipela asasait.

OLGETA PEPA INSAIT LONG DISPELA NIUSPEPA



I KAM LONG KAMPANI BILONG MIPELA TASOL.

## EDWARDS DUNLOP AND COMPANY LIMITED BRISBANE, QUEENSLAND



Mipela i amamas tru long wanem mipela i lukim niuspepa Wantok i kamap namba wan taim.

I gutpela samting tru ol pipel bilong Niugini i gat wangepela niuspepa bilong ol stret.

DISPELA BIKPELA MASIN BILONG BUNGIM OL PEPA I KAM LONG KAMPANI BILONG MIPELA.

## EDWARDS DUNLOP AND COMPANY LIMITED

Sydney

Brisbane


Melbourne

Adelaide

Perth

Newcastle






D.I.E.S. i orait mipela kisim dispela piksa bilong graun.

# WEWAK TIMBERS PTY. LTD.

(MASTA SNO NA MASTA ED)

PHONE 93 & 228

OL HAUS BILONG MIPELA I STRONG TRU  
TASOL I KOSTIM LIKLIK TASOL



3 Bedroom



2 Bedroom

(All houses passed by the Building Board)


long somil bilong mipela yu inap kisim olkain plang - painim ol samting i redi bilong wokim haus - painim ol kamda bilong wokim haus

ALL TYPES OF SAWN TIMBER

Low cost houses built or material supplied

Also at:

BOUGAINVILLEA DR. MADANG, PHONE 2214



Yes, ol brata, long mun i go pinis Praim Minista Gorton i bin kam hia long Niugini bilong lukim yumi ol manmeri bilong Niugini na givim sampela gutpela toktok long yumi.

Taim em i kam, ol manmeri i laikim tumas harim em i gat wanem kain toktok long selp gavman na independens. Bilong wanem ol i tingting planti long dispela samting? Long wanem olgeta man i pilim dispela samting bilong selp gavman na independens, tupela i bikpela samting tru long kantri bilong yumi hia long Niugini. Na tu, yumi pilim bikpela hevi na wari long dispela samting. Yumi pret nogut ol Yunaitet Nesens wantaim Australia i lusim yumi na yumi painim taim nogut, taim bilong pait na hangre, taim bilong sik na indai.

Tru tumas, ol brata, dispela samting i bikpela samting tru na yumi wari moa long en. Tasol husat inap long stretim ol dispela samting? Husat inap helpim yumi bai yumi abrusim ol dispela taim nogut? Husat inap strongim yumi bai yumi painim gutpela sindaun, gutpela lo na gutpela taim? Mi ting yupela ol yangpela manmeri, boi na gel tasol inap kisim hevi long dispela wok. Bilong wanem? Bikos kantri bilong yumi hia long Niugini i olsem wanpela sip. Na yupela ol yangpela manmeri i olsem stia bilong sip. Yupela save, sapos stia i stret, sip i save ran gut. Sapos stia i bagarap, bai sip i paul na goap long wanpela rip. I olsem long kantri bilong yumi hia long Niugini. Sapos yupela ol yangpela

manmeri i wok hat long stiaim na stretim kantri bilong yumi, sapos tingting bilong yupela i go pas long helpim, strongim kantri bilong yumi bai samting i ran stret. Tasol sapos yupela tingting long skin bilong yupela tasol na long mani, spak, na ol gutpela samting bilong graun; tarangu, sori tru long Niugini. Kantri bilong yumi i no ken kamap gutpela. Wok bilong yumi i no ken ran gut, na wantu taim nogut i painim mipela.

Olsem, mipela hia long WANTOK i pilim ol dispela samting na long olgeta niuspepa mipela i laik raitim sampela gutpela nius na skul na givim sampela gutpela aidia long yupela ol yangpela manmeri bai yupela ken skruim dispela tingting na aidia i go insait long wok na laip bilong yupela hia long Niugini bai kantri bilong yumi i ken kamap gut.

## Christian Literature

Books for service and education,  
School supplies in English and Pidgin

Kain kain buk  
bilong lotu na skul



### KRISTEN PRES

Publishers - Printers - Booksellers - Stationers

Sales Division: Christian Book Centre  
P. O. Box 222, Madang



## 'READ'

THE LITERACY AND  
LITERATURE MAGAZINE

- Published Quarterly
- Subscription \$1 yearly

The Editor, Box 43,  
P.O., Ukarumpa, E.H.D.

God i save mekim olgeta samting i wok wantaim bilong mekim gut long ol man i save laikim em. (Rom 8, 28)

WEWAK CHRISTIAN BOOK SHOP  
Christian books - Sunday School supplies  
Children's games - Stationery/School supplies  
Locally made basketware - Books on New Guinea  
THE CENTRE, WEWAK. PHONE 232.

# Guise I Wari Long Graun.

(New Guinea News Service)

Hetman bilong Haus av Asembli, Mista Jon Guise i tok em i wari bikos planti man tumas i save salim planti graun bilong ol.

Long de namba 18 bilong Julai em i spik, olgeta lo bilong graun long dispela kantri i mas gat wanpela promis insait long en. Man i laik baim graun em i mas raitim wanpela promis pastaim. Em i mas promis em i no ken kisim graun sapos pepa bilong graun i no laik. Na wanpela samting moa: em i no ken giamanim papa bilong graun.

Mista Guise i autim dispela tok bikos em i save Gavman i ting long raitim sampela nupela lo bilong baim graun. Gavman i mas lukaut gut na helpim ol netif pipel taim ol i dinau long ol graun bilong ol bilong kisim mani long han bilong ol waitman.

Mista Guise i tingim bek wanpela toktok wanpela bikpela kepten bilong ol sip bilong Englan i mekim long yia 1884 taim em i kamap long Port Moresby. Nem bilong dispela man Komododa Erskine. Em i promisim ol Niuginian bai i no gat man i ken stilim graun bilong ol. Gavman na arapela man i no ken kisim graun bilong ol netif sapos papa bilong graun i no orait long ol.

Long tingting bilong Mista Guise gavman i mas makim sampela netif bilong bosim graun; na sampela viles pipel tu i mas sindaun long ol komiti bilong bosim graun. Ol yet i mas orait long ol tok bilong baim graun. (N.G.G.S.)

DISPELA NIUSPEPA WANTOK BAI I KAM LONG YU LONG T.A.A.



**TAA i namba wan balus tru. Olsem na ol misis bilong balus bai lukautim yu gut tru. Ol mama tu ken flai long TAA.**

Sapos yu laik flai long balus bilong TAA, yu iken kisim tiket long Ofis bilong TAA long olgeta hap bilong dispela Teritori.

**TAA** No.1 - the friendly one

## KIBUNG LONG LAE

Het Asosiesen bilong ol wokman bilong Niugini na bai mekim wanpela kibung long Lae long namba 14 de bilong mun Ogas bilong ilektim ol ofisa.

Dispela Het Asosiesen i kamap namba wan taim long namba 5 de bilong mun Desemba long yia 1969, taim sampela wokman bilong kain kain Asosiesen i bung long Lae.

Kuskus bilong dispela Asosiesen inap nau na presiden bilong ol wokman long Lae, Mr. Michael Kaniniba, i tok

olsem: Inap tu de 8-pela Asosiesen i bin bung pinis insait long dispela Het Asosiesen na i bin tromo takis olsem memba tru.

Em i tok ol dispela Asosiesen i stap long Goroka, Mt. Hagen, Madang, Wewak, Rabaul, Popondeta Daru na Lae. Samting olsem 6,000 wokman bilong Niugini na sampela waitman tu i kamap memba bilong ol dispela Asosiesen.

## Husat I Tok - -

Long Septemba 1969 i gat 2,312,064 manmèri insait long Niugini. Bikpela bilong Niugini

inap 93,000 skwea mail.. I olsem: long Niugini i gat 25 man insait long wanpela wanpela skwea mail sapos yumi tilim nabaut ol Niuginian. Tasol em i liklik natting. Yu lukim.... Long kantri Monaco i gat 39,655; Long kantri Holan i gat 959; Long kantri Japan i gat 692; Long kantri W.Jemani i gat 600; Long Englan ol i gat 579; i tok mipela Niugini i planti tumas.

Orait, nau yu ting wanem long ol sampela man i no laik mipela i gat planti pikinini long Niugini? Ating ol i pret mipela i pulap tru.... giaman bilong ol.

# Gorton Lukluk Raun Niugini

Long Sande namba 5 de bilong Julai, Praim Minista bilong Australia, Mista Jon Gorton, i kamap long Port Moresby bilong mekim wanpela lukluk raun long Niugini. Insait long wanpela wik stret em i go lukim Goroka, Hagen, Mendi, Wewak, Madang, Lae, Rabaul na Kieta.

Long Janueri wanpela arapela man, nem bilong em Mista Whitlam, i bin kam tu long Niugini na em i bin mekim planti promis bai Niugini gat selp gavman long yia 1972 na independens long yia 1976. Nau Mista Gorton i raun bilong painimaut ol Niuginian ting wanem samting tru long ol dispela tok.

Long bikpela toktok Mista Gorton i mekim long wanpela kibung long Port Moresby em i tok gavman i laik senisim tripela samting long Niugini. Em hia:

1.) Bai 8-pela ministerial memba i wok insait long kaunsil bilong namba wan gavman i mas kisim moa pawa.

2.) Bai Haus av Assembly yet i gat moa strong long mekim ol lo na long tilim ol mani insait long Niugini.


3.) Sapos taim bilong selp gavman na independens i kamap, orait, 1000 saveman bilong Australia bai mas stap helpim ol Niuginian. Nogut ol man bilong Niugini i ting olgeta 6800 saveman i stap nau bai ol i ranawe. Nogat. Dispela wan tausen bai i stap; na bihain wok bilong ol i pinis, ol bai i gat wok gen long Australia.

Long olgeta hap bilong Niugini bikpela lain manmeri moa i kam bungim Mista Gorton. Long ol Hailan sampela i woka-baut longwe moa bilong lukim em. Ol i bilas naispela tru.

Long ples balus bilong Rabaul i gat 10,000 man bilong Mataungan Asosiesin i bungim Mista Gorton na pesman bilong

ol, Mista Jon Kaputin, i mekim wanpela toktok long nem bilong ol. Mista Gorton i bekim tok i spik, em i save ol Tolai i bruk tupela lain long tingting bilong ol. Olsem em i laik mekim wanpela bikpela kibung na askim olgeta Tolai wantaim long autim tingting bilong ol, bai em i save wanem tingting i win: tingting bilong ol Mataungan o tingting bilong ol arapela man. Tasol ol Mataungan ol i no laik.

Taim Mista Gorton o laik lusim Niugini na go bek long Australia, em i tok wantaim moa: Niugini i ken kisim selp gavman long laik bilong ol Niuginian tasol. Em i samting bilong ol. I no samting bilong wanpela hap, wanpela lain, bilong wanpela pati. Nogat, em i samting bilong olgeta man; dispela kantri em i kantri bilong



Mr. Matias Toliman, ministerial memba bilong bosim ol skul, wantaim Dokta McKinnon, hetman tru bilong bosim ol skul, tupela i lukluk long wanpela masin i raitim 5000 sek bilong peim ol tisa bilong misin.

Dispela kain misin i save wok hariap tru. Em irap raitim 35 sek insait long wanpela minit, 5000 sek insait long tupela aua.

Bihain long namba wan de bilong Julai olgeta tisa bilong misin na bi-

long gavman i bung long wanpela lain. Dispela 5000 sek i olsem pe i go long ol. Ol tisa i no mas bringim dispela kain sek i go long beng bilong senisim. Nogat. Olgeta misin, olgeta stua inap senisim.

Bihain long wanpela yia bai ol tisa bilong misin i ken tok, ol i laikim pe i kamap stret long han bilong ol, o ol i laik bai gavman i salim i go stret long beng bai i kamap long sekbuk bilong ol.

olgeta Niuginian. Olsem wanpela wanpela i ken vot wantaim em i laikim selp gavman na indepen-

dens i kamap. Sapos planti moa i laikim, orait, Australia i hepi tumas long givim.

Praim Minista bilong Australia Mr. John Gorton i toktok wantaim ol soldia bilong Pasifik Ailan Rejimen taim em i lukluk raun long Niugini.



# HELT

Plantí pipel long ol ples insait long Niugini i save kisim sik long wanem ol i no save long olkain sik i kamap olsem wanem. Sampela i dai long wanem ol i no save go long haus sik na kisim marasin. Nau mi laik tokim yupela long samting mipela i mas mekim bilong stopim ol sik i kamap bikpela. Ol samting hia i isi tru long mekim.

Namba wan lo bilong helt em hia: olgeta samting bilong yumi i mas stap klin. Yumi mas gat klinpela skin, yumi mas gat klinpela haus, yumi mas gat klinpela ples. Bilong wanem yumi mas olsem? Yumi mekim olsem bai yumi klinim ol jerm.

Jerm em i wanem kain samting? Jerm em i wampela liklik binatang tru. Yumi no inap long lukim long ai bilong yumi; ol i save glasim na lukim. Ol jerm i save kamap wantu na i no longtaim bai ol i gat, planti tausen pikinini moa. Olsem ol i save bringim planti sik long yumi.

Nau yu harim! Ol dispela liklik binatang i no laikim dispela samting hia: wara na sop, ples i tulait, na ples i gat win.

Orait, bai yumi mekim wanem nau? Namba wan samting yumi mas lukautim skin bilong yumi. Yu-

mi mas wacwac olgeta de wantaim sop. Yumi laik kaikai, orait yumi mas wasim han bilong yumi. Na tu bihain long yumi go long smolhaus, yumi mas wasim han bilong yumi.


Namba tu samting yumi mas lukautim haus bilong yumi. Brumim na klinim haus bilong yumi long olgeta de. Yumi mas opim dua na windo bilong larim win na lait i go insait long haus. Yumi mas hangamapim ol blanket na ol laplap long san na san bai klinim ol jerm. Yumi no ken tromoi pipia na hap kaikai nabaut, nogut bai ol lang i kamap.

Namba tri samting yumi mas lukautim ples bilong yumi. Yumi mas katim sotpela ol gras na bus i stap klostu. Yumi no mas tromoi skin tin, botol na sel kokonas nabaut long ples bilong yumi. Mobeta yumi mekim hul na planim ol dispela samting. Yumi mas lukautim tu long smolhaus bilong ples na putim tuptup long hul bilong em.

Sapos yumi lusim tingting long dispela samting bai planti sik, tumas i kamap long yumi na bai planti pikinini i dai.

Olsem na olgeta samting bilong mipela i mas stap KLIN.

God i mekim olgeta samting i wok wantaim bilong mekim gut long ol man i save laikim God.



Wanpela man bilong Sameria em i wokabaut long rot na i kam kamap long dispela man....na bel bilong em i sori tru long em. (Luk 10,34)

Hap long tok i stap long Pes 7.

## Husat I Tok - -

Long 10-pela yia i go pinis, dispela kantri i bin go het kwiktaim tru. Tasol sampela kain wok moa i mas kamap gut tru. Ol pipel i mas save gut lo, wok bilong Gavman na we bilong mekim ol dispela wok. Em i no inap long ol kaunsil na ol memba bilong Haus av Asembli i save long ol dispela wok. Pipel bilong dispela kantri i mas tingting: yumi olgeta bilong wanpela kantri tasol. Ol pipel long Niugini i mas mekim planti moa bikpela wok insait long pablik servis, ol i mas wok tu long lukautim ol bisnis. Yumi no inap long mekim ol dispela samting hariap; tasol ol dispela samting i bikpela tru na yumi

I gat 316 Netif Koprativ Sosaiti long Niugini. Insait long ol i gat 100,000 netif memba na ol i save wok long \$7,000,000 (seven million dola) long wanpela yia. Husat i tok ol Niuginian i no gat mani?

mas mekim pastaim.


Mi ting ol man i kam long arapela kantri i save pinis olsem ol Papua pipel na Niugini pipel i mas i gat pipel bilong ol yet insait long wok bilong bisnis na wok bilong Gavman. Sapos ol pipel i wok wantaim, mi ting bai i gat gutpela taim.




WEWAK'S LARGEST WHOLESALE AND RETAIL MERCHANTS WISH WANTOK EVERY SUCCESS

TANG MOW (1960) PTY. LTD.  
P. O. BOX 105, PHONE 59


# SANYO



TEP RIKODA  
Smolpela tru. Strongpela moa.  
I no kostim planti.  
Yu inap yusim long bateri tasol.



NAMBAWAN REDIO bilong harim musik na nius.  
Yu baim Sanyo long liklik mani tasol.  
Karim Sanyo i go long ples  
bai ol i amamas tru,  
bai yu gat namba.



Ol samting bilong SANYO  
i kamap long  
dispela kampani hia:

PIKAP NA REDIO WANTAIM  
Sanyo - samting tru.  
Sanyo - smat moa. Tupela spika.  
Yu laik harim redio? Orait. Yu laik pilai rekot? Orait.  
Sanyo i redi - oltaim. Maski lektrik, Bateri inap.

TERRITORY AGENTS

## BRECKWOLDT & CO. (N.G.) PTY. LTD.

PORT MORESBY  
P.O. Box 1549, Boroko.

MADANG  
P.O. Box 185.

LAE  
P.O. Box 557.

RABAU  
P.O. Box 222.

MT HAGEN  
P.O. Box 237.

WEWAK  
P.O. Box 178.

KIETA  
P.O. Box 72.

*Congratulations  
to Wantok Publications  
on their first issue*

*from the  
WEWAK PHARMACY  
The Centre, Wewak  
Phone 234, P.O. Box 172*

*Specialists  
in Photographics*

*Kodak Cameras and Film  
Polaroid Cameras and  
accessories  
Asahi Pentax Photographic  
Equipment*